

9

I

DEO OPTIMO MAX.
UNI ET TRINO.

VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS
*manè disceptanda, in Scholis Medicorum, die Jovis vicesimâ-quartâ
Martii anni M. DCC. XXXV.*

M. MICHAËLE PEAGET,
Doctore Medico, Præside.

An Aqua fluviatilis cæteris aquarum speciebus salubrior?

I.

EST ea tum generis humani conditio, tum cæterorum animalium necessitas, ut non solidis duntaxat alimentis, sed & fluidis uti debeant atque sustentari. Hinc, cum solida necessariò postulent à fluidis alimentis dissolvi atque attenuari, mirum illud est, quòd fluida, quæ solvendis dividendisque solidis sunt dicata, non tantum videantur habere energiæ, quantum habere videntur præ fluidis solida. Verùm, re ad lancem trutinatâ, statuimus nec fluida solidis corporis humani partibus, nec solida fluidis sic imperare, ut hinc illinc non dicas esse imperium. Solida impelluntur à fluidis, fluida solidorum ope protruduntur. Liquida strictè dicta duas liquidorum corporum species comprehendunt. Aër ambiens, quem spiritum ducimus, unam constituit liquidæ speciem; alteram constituit aqua. In eo discrepant à se invicem, quòd aër ex se liquidus quidem, at non humidus; aqua verò humida liquidaque sit. Aquæ naturam vis explorare? Rem aggredieris satis difficilem. Duas præsertim Philosophorum sententias afferemus, quarum utram mavis, elige. Statuunt nonnulli in eo positam esse aquæ naturam, ut ejus molecule acuminatæ sint & rigide, undè in corporum poros dum incurunt, faciliè ingrediuntur. Argumentum ex eo petunt, quòd balneorum aqua cutis meatus transgrediatur & cum sanguine misceatur, cujus moles & fluiditas hac arte augentur. Afferunt alii aquæ moleculas in acumen quidem hinc inde desinere, at esse flexiles anguillarum more, ac proinde subeundis corporum omnium potis magis idoneas. Quidquid sit, cum aquam

2

œconomia animali necessariam esse nemo non sibi persuasum habeat, cumque aqua sit qualitate multiplex atque diversa, hanc illamve aquæ speciem cæteris anteposito. Aquam inter bibendam & corporis humani reliendam tuendamque fabricam ea debet intercedere proportio, quæ ad sanitatem potissimum conferat. Ad sanitatem verò eam potissimum conferre judica, quæ præ cæteris aquarum speciebus alimenta ritè dissolvit, faciliè digerit, feliciter distribuit.

I I.

INTER diversas aquarum species numerantur pluvialis, fontana, fluvialis, lacustris, palustris, putealis, imò stagnans in cavà depressâque terræ superficie. Super his diversis generis aquis hoc ratiocinamur modo. Aqua pluvialis, cum à pluvia ex aëre in terram deciduâ suppeditetur, veterum quidem Medicorum laudibus diù inclauit, atque etiam nunc à quâ plurimis maximè prædicatur. Eorum tamen pace dixerimus, ea non est aqua pluvialis, quæ tantis encomiis ad cælum evehi mereatur. Aqua fontana, etiam quibusdam præ omnibus aquæ speciebus placeat, suo non caret incommodo. Aqua lacustris multò nobis esse videtur fontanâ deterior: aqua palustris vix aliquibus prodest, nec nisi sitientibus æstivo tempore, & aquæ, quam hauserunt, pravitate exercitio emendaturis. Aqua putealis, si profundus admodum sit puteus, nec per se salubris est, & emendationem vix admittit. Aqua stagnans, si cuiquam potest non displicere, hunc existima Bæotum in patriâ crassoque sub aëre nasci. Aqua fluvialis eas habet dotes, quas nemo non miretur. Intellige igitur quid sit fluvius, unde fluvii origo, quantum terræ decurrat spatium, cum in usum trahitur, quid ex decursu satis amplo terræ spatio salubritatis colligat. Hoc facto examine, nihil potulenti deprehendes in rerum naturâ, quod ad conservandum genus humanum majoris sit auxilii. Aliud credis liquidum esse potulentum præter aquam? Esse quidem fatemur; at diffitemur quidquam esse potulentum & salubre, quod suam virtutem aquæ non debeat. Quod si has dotes ab aquâ fluviali mutuetur, urpote omnium aquarum præstantissimâ, adhuc longe salubrius evadet.

I I I.

ETIAMSI de nonnullis aquarum generibus vario Marte jamdiù disputatum sit, illud tamen affirmamus à disputantibus nunquam non fuisse peccatum. Qui pluvialis aquæ præstantiam cæteris palmam præripere contendebant, rationum non tam momentis, quàm specie ducebantur: qui fontanam optimam esse defendebant, hujus naturam non satis esse rimari videntur: qui de fluviiis fluviorumque bonitate non ineptè locuti sunt; ii quidem iustam sibi causam propugnandam susceperunt, licet malè defenderint. Nam à fontium, undè fluvii manaverant, excellentiâ, fluviorum bonitatem reperebant. Sed quis sanæ mentis autumabit fluvii nomine, fontem; fontis appellatione, fluvium esse intelligendum? An non vel ab antiquis rerum medicarum arbitris fluvii nomine præsertim insigne batur ille, qui, quò longiùs à suo fonte distabat, eò propius ad fluvii titulum accedebat? Undè quò majus terræ spatium emeritur quisque fluvius, eò fluvii nomen sibi vindicat magis. Queris an idcirco sa-

3
rubrior, & quamobrem? Salubriorem asserimus, quia motu suo plūs dividitur & solis, cui patet, calore plūs attenuatur. Has dotes non habet Sequana fonti suo proxima, ex quo profluit, in Burgundiā; habet autem ad nos usque delatus, imò majores ad Rothomagi mœnia. Comprobatum est experientiā nulum esse fluvium, qui secum non vehat multiplicis generis salia, è quorum virtute fluviatilis aquæ benefica vis augetur, & œconomia animali præ cæteris aquis proficua. Observatum est, exhalatâ Sequanæ aquâ, salis Glauberi portionem esse fluvium, in vasis fundo fuisse non semel repertam, quemadmodum Regiæ Academiæ Parisiensis demonstravit hujus Scholæ Doctor Medicus Clarissimus Geoffroy; undè rectè colligitur, & ventris laxitatem provocari, & tolli viscerum infarctus atque obstructions. Hinc nulli non aqua Sequanæ salubris esse comperitur. Quid quod Sequana salis communis portionem cum secum roret, quid non inde sperandum boni? Hoc sal tum dividit, tum refrigerat alimentorumque digestionem promovet. Præterea sal volatile & oleum aquæ fluviatili inesse censemus eò majori copiâ, quod animalia animaliumque partes in aqua fluviatili præ cæteris aquæ speciebus reperiuntur. Hoc si non esset, quid, queso, piscibus in escam cederet? Imò pisces ipsi, seu vivos seu mortuos supponas, aquæ fluviatilis virtutem non mediocriter augent.

I V.

AQUA cum sit ideò creata, ut diluendis corporis animalis succis præcipuè inserviat, nullam esse putamus aquam, quæ non hoc officio aliquatenus defungatur, modò adhibeatur cautio. Antiquis, præ cæteris arridebat aqua pluvialis. Hæc aquæ species à solis calore in atmosphæra hanc illamve partem evecta levitatem indicat suam, inquebant, quod in cælum faciliè tollitur; tenuitatem verò, ac proinde præstantiam arguit, quod solis radiis sit propior, unde major hujus aquæ salubritas. Ratiocinium fallax. Nam aqua pluvialis nonnisi caloris vi quidem in altum tollitur; sed non nisi caloris plerumque defectu in terram recidit, ita ut non aliter à radiis solaribus calefiat, quam altissimorum montium cacumina, quorum nives vix aut nunquam liquantur: Rationem queris? accipe. Quemadmodum montium cacumina radios solares non reflectunt, sic nec aqua in aëre pendula; hinc ejus particulae haud satis à se invicem radiorum interventu divisæ, coeunt, & propter molem in pluviam degenerant. Non negamus interim æstate fieri posse, ut aqua pluvialis eum habeat caloris, tenuitatis, & divisionis gradum, quem in optimâ aquæ specie exigimus. Sed cum vel domorum tegulis, vel tubulis, vel cisternis, aliterve decidens excipiat, ejus usum non tam tutum esse credimus, quam aquæ fluviatilis. Aqua fontana, cum nec per certum terræ spatium sic moveatur, ut satis divisa sit, cumque radiis solaribus non diu obiciatur, nec proinde satis incalcescat, reliquum est hanc aquæ speciem nihil sanitati præter pondus & viscerum gravitatem asserere, si hieme præsertim hauriatur. Aquæ palustris lacustrisque etiamsi solis pateant radiis, attamen cum progressivus earum motus maximè tardetur; hinc sequitur primò eas limi terræque particulis scatere atque inquinari; deinde earum augeri motum intestinum, unde graveolentia; denique cum à motu progressivo non comminuantur, dividendis digerendisque alimentis pa-

4

rum esse idoneas. 'Aqua putealis si putei fundum transeundo præterfluit, nec aliundè puteus sit præter modum profundus, urgente necessitate potest æstivo tempore usurpari. Quòd si non suppeditetur à præterlabente in terræ visceribus rivulo, à corpore humano prorsus arceatur. Quod spectat stagna, jumentis ea, nisi siti percutibus nauseam movent. Constat igitur recensitas jam aquas esse aquâ fluviali virtute inferiores.

V.

CORPUS humanum cùm diversî generis liquoribus perluatur, eam exigit aquæ speciem, quæ nec ventriculum gravet, nec intestina lædat, nec in vasorum hæreat anfractibus, sed quæ alimenta faciliè subeat & dividat, quæque succum nutritivum ad partes nutriendas vehat. Quid huic officio magis accommodatum, quam aqua? Quanam aquæ species magis idonea, quam fluvialis? Est hæc enim, ventriculo levis, intestinis amica, comminuendis alimentis extrahendisque alimentorum succis præ cæteris necessaria; est hæc, quæ vel exilissima corporis vasa permeet, & per colatoria quævis fecernendum transmittat succum, & excretionis secretionisque materiam è sanguinis gurgite extricet; est hæc quæ sanguinem ipsum à coailitæ & densatione vindicet, quæ salia fundat, quæ partibus solidis rigiditatem nimiam auferat, molliem naturalem conciliet, ac proinde sanitatem cõserves. Quod si quis objiciat aquam fluviatilem partibus salinis, quales suprà descripsimus abundare; an non etiam ex hoc fonte virtutem ipsi majorem tribuendam esse censuerit? At, inquit, partes animalium excrementitiæ quoties aquæ fluviali immerguntur, toties œconomix animali idcirco sunt nocituræ, quòd ab excrementis deriventur. Argumentum specie quidem pulchrum, sed re & ratione vacuum. Nam animalium partes eorumve excrementa, si fluvii fundum petunt, fluvio multò graviora; si superficiem, leviora; si mediam aliamve fluvii partem; æqualis esse cum fluvio ponderis comperiuntur. Ex his collige oleum & sal volatile animalium ad fluvii superficiem natæ, in quâ præsertim aqua hauritur, unde aquæ fluviali major energix accessio. Nec curamus, utrùm hæc, quam prædicamus, fluvialis aqua levior sit cæterarum aquarum speciebus nec ne. Nam si gravior esse supponeretur, quod falsum non semel est demonstratum, tamen ponderis incrementum hujus liquidi salubritate compensaretur.

Ergo Aqua fluvialis cæteris aquarum speciebus salubrior.

Proponebat Parisiis, JOANNES ISOARD, Reius
apud Gallo-Provinceales, Baccalaureus Medicus, A. R. S. H.
1735. à sextâ ad meridiem.